

## PROTHEROE, DANIEL (1866 - 1934), cerddor

**Enw:** Daniel Protheroe  
**Dyddiad geni:** 1866  
**Dyddiad marw:** 1934  
**Rhiant:** Eleanor Prothero  
**Rhiant:** Daniel Prothero  
**Rhyw:** Gwryw  
**Galwedigaeth:** cerddor  
**Maes gweithgaredd:** Cerddoriaeth; Perfformio  
**Awdur:** Robert David Griffith

Ganwyd 5 Tachwedd 1866, yn Ystradgynlais, sir Frycheiniog, mab Daniel ac Eleanor Protheroe. Ei athrawon cyntaf oedd Philip Thomas, [J. T. Rees](#), a [D. M. Lewis](#). Yr oedd ganddo lais da yn fachgen ac enillodd wobrwyon am ganu yn eisteddfodau cenedlaethol Abertawe a Merthyr, 1880-1. Yn 18 oed, ef oedd arweinydd côr Ystradgynlais, a chafodd y wobr yn eisteddfod Llandeilo.

Yn 19 oed ymfudodd i Scranton, Pa., U.D.A., a bu am gwrs o addysg o dan Parson Price, Dudley Buck, a Hugo Karn. Yn 1890 graddiodd yn Faglor Cerdd (Toronto), ac yn ddiweddarach cafodd radd Doethur Cerdd. Am wyth mlynedd bu'n arweinydd y Cymmrodorion Choral Society, Scranton. Yn 1894 symudodd i Milwaukee a bu yn arweinydd i amryw o gymdeithasau corawl. Yn ddiweddarach symudodd i Chicago, a phenodwyd ef yn arweinydd i nifer o gorau, yn athro yn y Sherwood Music School, ac yn gyfarwyddwr cerdd y Central Church. Ymwelai â Chymru yn gyson, a bu yn beirniadu yn yr eisteddfod genedlaethol, ac yn arwain gwyl gerddorol Harlech, 1931.

Ysgrifennodd y llyfrau *Arwain Corau*, 1914, a *Nodau Damweiniol a D'rawyd*, 1924. Cyfansoddodd lawer iawn - y gantawd ' St Pedr ' ac eraill. Bu ei ddarnau i gorau meibion, ' Invictus,' ' Nun of Nidaros,' ' Bryn Calfaria,' ynghyd â ' Jesu, lover of my soul,' yn ddarnau prawf mewn llawer o eisteddfodau, a cheir ei anthemau, tonau, a thonau plant bron ym mhob casgliad o donau Cymraeg. Bu farw yn ei gartref yn Chicago, 25 Chwefror 1934.

### Awdur

Robert David Griffith, (1877 - 1958)

### Ffynonellau

*Y Cerddor*, Medi 1898, Ebrill 1934

### Darllen Pellach

[Daniel Protheroe 1866-1934](#), gwefan T Cerdd, gwelwyd 8 Ionawr 2019

### Dolenni Ychwanegol

Archifau LIGC: [Daniel Protheroe and Rhys Morgan Papers](#)

VIAF: [51262880](#)

Wikidata: [Q5218493](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.